

# MOVIMENT FRIÛL

---

La prime Fieste Nazionâl dal Friûl

3 di Avrîl 1977

Des memoriis di Adrian Cescje e Marc De Agostini

A jerin plui di doi agns che tal Moviment Friûl si smicjave di organizâ une fieste de Nazion Furlane, ai 3 di Avrîl, di cuant che Zorç Jus, intune conference publiche a Tresesin sul libri di Arduino Cremonesi, *L'eredità europea del Patriarcato di Aquileia*, al disè che, in considerazion di ce che al jere stât scrit in chel libri, si varès vût di pensâ di dâ ancje al Friûl la sô fieste nazionâl, e che la date dai 3 di Avrîl e sarès stade la plui adate par chel intindiment. La idee di Jus e jere plasude e e jere madressude tes conversazion dal partît. I plasè ancje a pre Checo Placerean, e ai predis di Glesie Furlane. Si spietà però fin tal 1977 par organizâle, cuant che tal clime de ricostruzion dopo dal taramot si percepire che la int si jere tornade a sintî plui furlane di simpri. Il partît al decidè, duncje, di fâ la fieste, e di propagandâle plui che sul sfuei dal partît, Friuli d'Oggi, su la Patrie dal Friûl, che le veve tacade a publicâ in chel an la Clape Culturâl Furlane Hermes di Colored, editôr Marco De Agostini. Pe ocasion a forin stampadis 20.000 copiis de Patrie, a forin ordenadis 300 bandieris cu la acuile patriarcjine di doprâ te manifestazion, a forin stampâts e picjâts centenârs di manifescj cul invît dal MF a partecipâ ae fieste. L'MF al ordenâ ancje il palc in place par che pre Checo al fevelàs ae int. Il segretari dal Moviment Friûl Marc De Agostini cun pre Checo e Pieri Londar a lerin a fevelâ cul sindic di Aquilee e cul plevan par vè il permès di organizâ la manifestazion te place e, stant che al coventave ancje il placet dal vescul di Gurize, al garantì la organizazion 'perfete' de fieste, anticipant personalmentri lis spesis di dute la organizazion. I predis di Glesie furlane e Civiltà Mitteleuropea a vevin sigurât che a varessin cjatâts i finanziaments e i sponsors, e che la fieste, inalore, e leve fate. E je stade un grande partecipazion di int di ogni bande dal Friûl, cu la Messe in Basiliche celebrade di pre Checo e il so discors in place, e il Moviment Friûl al sielzè di mantignîsi defilât cui siei simbui par che si ves la sensazion che chê no jere la fieste dal Moviment Friûl, cun dut che le veve organizade e paiade, ma la fieste di ducj i Furlans. La stesse coretece e la stesse sensibilitât no fo rispietade di altris convignûts.

Passade la fieste, nissun si presentà a puartâ il so contribût pes spesis sostignudis, che al scugnî paiâlis il segretari. Un pâr di mêis dopo, cuant che i predis di Glesie Furlane a pensarin di davuelzi une politiche furlaniste in maniere autonome rispiet al Moviment Friûl, saborâts di altris organizazion interessadis a meti in dificolât il moviment autonomist, si presentarin li di De Agostini par domandâi di cediur la proprietât di *Patrie dal Friûl*, si sintirin rispuindi dal segretari che ur varès cedude la *Patrie* se a vessin acetât ancje i debits ingrumâts tal 1977. Al fo in chê volte che pre Josef Cjargnel e Beline, che si vuardarin di acetâ la propueste di De Agostini par vie di chei debits, a diserin che il segretari dal Moviment Friûl al voleve speculâ su la *Patrie* e a lassarin cori intor chê calunie par che cul timp i crodessin massime chei che lis vicendis no lis cognossevin. Si procurarin une declarazion dal vieli editôr di *Patrie dal Friûl* Felix Marchi che ur cedeve la testade, e a scomençarin a publicâ tal 1979 *La Patrie dal Friûl*. Dal vèr, Marchi nol podeve cedi dirits di une testade za scjadude e che De Agostini par conte de Clape Culturâl Furlane Hermes di Colored al veve regjistrate al nr. 384 dal regjistri dal Tribunâl cu la date dai 13 di Dicembar 1976. Al veve ancje ricevût une letare di ringraziament di Marchi par vè tornât a resurf *Patrie dal Friûl*; la cession di Marchi no veve valôr legâl, tant al è vèr che il gnûf sfuei si clamà *La Patrie dal Friûl*, ven a stâi une testade diferente.

Vuê la Fieste de Patrie dal Friûl e je condividue di ducj, fintremai istituzionalizade, ma cence il Moviment Friûl no sarès mai nassude e, ancje se no i va ricognossût a pre Checo il merit di vêle pensade par prin, lui al à tancj di chei merits te storie politiche e culturâl furlane che no i covente che i si atribuissi ancje chest. Al è just che si cognossi lis circostancis che e je nassude, bielis o mancul bielis che a sedin stadis. Al è just che i Furlans a sepin ricognossisi ancje intes incompressions, che a son la reson principâl des divisions che no ur permetin di gjoldi di una autonomie plene e dignitose.

**Int inte place de Basiliche di Aquilee ai 3 di Avrîl 1977.**



